



Presidente da República

MENSÁJEN HUSI SUA EXELÉNSIA PREZIDENTE REPÚBLICA
DR. FRANCISCO GUTERRES LÚ OLO IHA LORON RFLEKSAUN BA
KOMEMORASAUN LORON MUNDIÁL ANTI-KORRUPSAUN

Dili, 30 novemburu 2018

Onra boot mai ha'u, nu' udar Prezidente Repúblika, atu hato'o ha'u-nia mensájen badak ida ba partisipante tomak iha loron Reflesaun ba Komemorasaun Loron Mundiál Anti-Korrupsaun, ne' ebé organiza husi CEPAD / Grupu Konsultivu Nasional Anti-Korrupsaun/GKN-AC.

Durante ha'u-nia mandatu tomak ha'u sei tau matan beibeik no fó atensaun maka' as ba asuntu korrupsaun ne' ebé, infelizmente, sei sai hanesan problema boot ida iha ita-nia País. Tanba ne'e mak importante tebes atu ita halo nafatin reflesaun no komemora Loron Mundiál Anti-Korrupsaun. Lia fuan Mundial hatudu mai ita katak Korrupsaun hanesan problema mundial ida, nebe afeta Nasaun barak no la' ós problema ida ne' ebé mosu de'it iha ita-nia Rain, Timor-Leste.

Iha hau-nia intervensaun sira ha'u bolu atensaun beibeik ba saída mak korrupsaun bele halo ba ita-nia Rain. Korrupsaun mosu wainhira iha falta de interesse ka laiha kompromisu atu kontribui ba Povu nia moris di'ak. Korrupsaun la fó dalan ba dezenvolvimento ida ne' ebé timoroan hototu bele sente. Korrupsaun loke dalan ba grupu balun hodi hetan priviléjius barak no hetan riku lalais maibé halo ita-nia Povu kiak no mukit ba nafatin.

Tanba ida ne'e duni mak Prezidente Repúblika halo beibeik apelu ba responsáveis hothotu atu iha rigor no transparênciā iha ezekusaun ba despeza pública hodi assegura katak rekursus husi Estadu sei lori duni benefisius ba Povu Timoroan tomak.

Iha tinan 2008 liubá, Estadu Timor-Leste ratifika no implementa Konvensaun Nasoens Unidas Kontra Korrupsaun. Ida ne'e hatudu seriedade no mos kompromisu husi ita-nia Estadu atu prevene no kombate korrupsaun iha ita nia-rai doben. Maibé, Parlamentu Nasional seidauk aprova Lei Anti-Korupsaun ne'ebé ferramenta importante idā hodi kombate korrupsaun. Prezidente Repúblika hein katak iha tempu badak Parlamentu Nasional bele remata prosesu ida ne'e hodi aprova Lei Anti-Korupsaun ida ne'ebé forte. Ho ida ne'e, Instituisoens tomak, ne'ebé halibur malu iha Grupu Konsultivu Nasional Anti-Korupsaun, hanesan Ministériu Públiku, Komisaun Anti-Korupasun, PDHJ, Komisaun Funsaun Públiku, Instituto Nasional Administrasaun Públiku, Igreja, Inspetoria Jeral Estadu no GOPAC no liñas ministeriais hotu, sei iha asesu ba ferramenta ida tan hodi bele kombate korrupsaun ho efisiēnsia no efikásia, no fó punisaun loos ba korruptór sira.

Prezidente Repúblika apoia iniciativa hothotu nebe nia intensaun atu kombate no prevene korrupsaun. Kombate korrupsaun laos fásil no presiza esforsu ida nebe kontínuo no ho koordenasaun. Prevene korrupsaun hanesan ezersísiu no esforsu ida ne'ebé ita hotu tenke halo, loroloron, iha ita-nia atividade tomak. Ita, responsáveis hotu-hotu, tenke halo nafatin kampaña nasional ida, liuhusi programas edukasaun sívika, hodi hasa'e pùbliku tomak nia koñesimentu kona-ba korrupsaun.

Ba organizador sira husi eventu ida ne'e, ba orador sira, no partisipante sira hotu, Prezidente Repúblika husu deskulpa tanba, pur-motivus ajenda, labele hamutuk ho Ita-Boot sira iha loron reflesaun ida ne' e.

Kombate no prevene korrupasun ita hotu nia responsabilidade.

Mai ita hotu servisu hamutuk ba ema hothotu nia moris-di'ak.

Obrigadu